

Ang Istorya ni Jackson

Si Jackson nagdako sa usa ka pamilya kinsa matinud-anon nga mga miyembro sa Ang Simbahan ni Jesukristo sa mga Santos sa Ulahing mga Adlaw. Siya adunay mahigugmaong mga ginikanan ug suod kaayo siya sa iyang igsoong babaye nga si Selena.

Si Jackson nahigugma sa ebanghelyo ug adunay pagpamatuod ni Jesukristo ug sa Pagpahiuli. Nailhan siya sa iyang malipayon ug alegre nga personalidad. Karong bag-o, hinoon, ang iyang pagkamalipayon gipulihan sa kasubo, ug kanunay na siyang mag-inusara. Si Jackson adunay sekreto ug wala masayod unsay buhaton niini.

Sukad sa iyang nahinumdoman, si Jackson mas naibog sa mga lalaki kay sa mga babaye. Sulod sa daghan nga mga tuig naningkamot siya sa pagbaliwala niini nga mga pagbati o nagpakaaron-ingnon nga wala kini diha. Tungod kay kini nga hilisgotan wala gayod mahisgoti sa iyang panimalay, gibati niya nga gidili kini nga panagsultihanay. Usahay ang iyang mga higala mihimo og dili maayong mga komentaryo mahitungod sa gay nga mga tawo. Ang tanan niyang nahinumdoman gikan sa mga magtutudlo ug mga lider sa simbahan mao nga ang homosexuality usa ka seryoso nga sala.

Sa wala pa ang iyang misyon si Jackson balik-balik nga nangamuyo sa Dios sa pagkuha sa iyang pagkaibog sa mga lalaki. Mibati siya nga masaligon nga kon siya moserbisyo og misyon, ang iyang mga pagbati mausab. Hinoon, sukad nakompleto ni Jackson ang misyon, ang iyang pagkaibog sa mga lalaki nagpadayon. Si Jackson gusto gayod kaayo nga makigsulti sa usa ka tawo, apan ang kahadlok nakapahimo niya nga magpakahilom.

Si Selena nakamatikod sa iyang emosyonal nga pagpalayo gikan sa ilang pamilya. Makita niya ang kasakit sa iyang mga mata. Nag-ampo na siya alang ni Jackson ug nag-ampo nga makahibalo unsaon sa pagtabang kaniya.

Karong buntag si Selena mihangyo ni Jackson nga mahimo bang maglakaw-lakaw silang duha. Nagduhaduha siya nga miuyon. Samtang sila naglakaw, nag-istorya sila mahitungod sa matag adlaw nga mga butang. Gani napahiyom ni Selena si Jackson. Sa kataposan, si Selena miingon, “Jackson, nasayod ko adunay dili maayo. Makita nako kini sa imong mga mata. Palihog sultihi ko. Nabalaka kaayo ko nimo.”

Si Jackson nagbarog lang sa dugay nga higayon. Mga luha misugod sa pag-agas sa iyang nawong. Sa kataposan, usa ka grabe nga emosyon misiak gikan sa kinahiladman, ug uban sa nagkurog nga tingog miingon siya, “Selena, bayot ko ug ingon niani kutob sa akong mahinumdoman. Wala ko kahibalo kon unsa ang buhaton. Nahadlok ko unsay isulti ni Mama ug Papa kon makahibalo sila. Ang ato bang pamilya maulaw kanako? Ang ako bang mga higala gustong makig-uban nako kon sila makahibalo nga ako bayot? Unsay mahitabo sa akong pagkamiyembro sa Simbahan kon akong sultihan ang bishop? Wala nako makita unsaon nga ako magmalipayon pa ug makabaton og pamilya. Gibati nako nga ingon ang Dios mibiya kanako.”

Giduko ni Jackson ang iyang ulo ug mitutok sa yuta. Human sa taas nga kahilom, hinay siyang miingon, “Selena, pasayloa ko kon ako nakapahigawad nimo. Palihog ayaw sultihi si bisan kinsa. Gibati nako nga nahisalaag ug naglibog.”

Panaghisgot nga mga Pangutana

1. Unsa ang inyong mga pagbati samtang kamo naghunahuna mahitungod sa kasinatian ni Jackson? Ngano kaha nga lisod ang pagpakigsulti mahitungod sa mga pagbati sa pagkaibog sa managsama og sekso uban sa usa ka sakop sa pamilya, suod nga higala, o sa lider sa Simbahan?
2. Unsa kaha ang inyong bation kon kamo si Selena? Unsay mahimo ni Selena aron makatubag uban ang pagsabot ug kapuangod?
3. Sa unsa nga paagi nga ang sakto nga pagsabot sa mga pagtulun-an sa Ginoo bahin sa pagkaibog sa managsama og sekso makatabang ni Selena ug Jackson? Ngano kaha nga kini nga mga pagtulun-an usahay lisod nga dawaton?
4. Unsaon ni Jackson ug Selena pagtan-aw ang pagkaibog sa managsama og sekso uban sa mahangtoron nga panglantaw?
5. Asa pa ang maduolan ni Jackson aron makadawat og dugang nga giya, pag-awhag, ug tabang?